

# Tiwei Pol Kewisik Ken Timoti-1

## Menmen me tiwei ik

Pol katip Timoti gude 1:1-2

Him me mit ne weiwik me God netike mit iuwe nir naanmipri 1:3–3:16

Pol katip Timoti menmen me wok hirak kakisesim 4:1–6:21

**1** <sup>1</sup>Hi Pol hi aposel ke Krai Jisas. Nipaa God kerek ketaihis naanmiprai ketike Krai Jisas kerek haiu wen memeriwiwek kaknen kaktaihis, hirakit epei tehimitena hi aposel hirakit teriuweta hi ano hatip mit him mirak.

<sup>2</sup>Hi Pol hi hesiuwe tiwei ik ken ti Timoti, ti hire nikan kai kerekek ke menmen me God. Hi hanhan God Haai ketike Krai Jisas Mitik Iuwe kaiu han yaaik kirakit tatu tatikewit, hirakit hanhanit tatrekyut yaaim te ti ehu werek werek.

## Ti eremir him enum me memipin

<sup>3</sup>Hi hanhan ti ehu wit Efesas har ke nipaa hi epei ano provins Masedonia hi hetputem. Mit han en hir natip mit him enum me memipin, te hi hanhan ti etpor him manp hir ap natip mit miyapir en him ham me nipaa haiu ap metporem au emit! <sup>4</sup>Hir ap han ekitet wit tipir o tipitim mei yapirwe me nipaa maamrer nir ne Isrel nekrit neke nein nan au emit! Menmen im me memipin mikaap mit hir niriak menmen me God nisesim au. Hir newepnak netpim weinim weinim te hir nenehan neriuwerem newaank han kir keriuwerem. <sup>5</sup>Hi hetput him manp me menmen im hentar hi hanhan mit ein hir hanhan God ketike mit. Hi hanhan hir han yaaik prar prar nepu. Hir nepu nar ek, te hir nanirtei hir hanhan enises God. Te hir ap nemipin natip haiu emises God au. Hir nanriak im, te hir hanhan God ketike mit. <sup>6</sup>Mit han hir neweikin sip newet him im hi hetputem, hir nises him weinim nar ke mit nitet yayiwe hak nipun wit

<sup>a</sup> 1:1 Kl 1:27   <sup>b</sup> 1:2 Ap 16:1-3; Ta 1:4   <sup>c</sup> 1:4 1Ti 4:7; Ta 1:14   <sup>d</sup> 1:5 Ro 13:10

hir netariyem. <sup>7e</sup>Mit in nare nanteikin mit han him me God nipaa Moses kewisim mau tiwei, te hir natip, “Him maiu hiram yaaim.” Te hir ap nertei him me Moses werek werek. Hir ap nertei him im hiram matip me mekam au!

<sup>8f</sup>Haiu mertei mit nanises him me God Moses kewisim mau tiwei werek werek, hiram yaaim meteikin mit menmen enum hir niriakem. <sup>9</sup>God kewet Moses him mirak, te haiu mertei him lo hiram ap me mit yaain au. Hiram me mit kerek ninaain him mirak, neweikin sip newetiwek kerekek. Mit in hir han kitet menmen enum, hir paan tokik ap nemtau him me mit hir ninin naanmipri au. Hir han menepep God netpepik nisesik, hir newaank menmen mirak, hir nenepan netike miye haai. Hir nenep mit nani. <sup>10g</sup>Hir netike miyapir nariyanhis neweninem, hir netike mit han niyewowan, hir netenen mit neriuweti nen, te hir nanit pewek mamreri. Hir newen him nenepakmenek, hir niune nerp neit. Menmen im metike menmen meiyam enum ap mises Him yaaim me God. <sup>11h</sup>Him im yaaim kerek God kewetewem, hi hatip mit miyapir em. Hiram meteiknai mamirkeik God hirak yaaik kire si, hirak hanhan haiu mamtikerek mamu werek werek mamir ke hirak kepu.

#### Pol han yaaik God hanhanek

<sup>12i</sup>Hi han yaaik heriuwe Mitik Iuwe kaiu Kraiss Jisas kentar hirak kekepa kenipa hi manpenuk, hirak han kitet hi yaaik te hi hiriak menmen mirak. Hi han yaaik hentar hirak kehimitena hi hiriak menmen mirak. <sup>13j</sup>Nipaa hi eweikin sip hewet Jisas hi hatip enum me Kraiss, hi hanhan hiriak enum hi hewaank mit miyapir kerek nises him mirak. Te Kraiss hanhana keweikin han kai te hi hisesik hentar hi hetari menmen mirak, hi han kitet hi hiriak menmen yaaim hikaap God. <sup>14</sup>Mitik Iuwe hanhana wisenum, te hi eisesik hanhanek. Hirak kekepapai haiu yapirwe meriuwerem mentar haiu mit nirak.

<sup>15k</sup>Him im hiram yaaim, hiram werek te mit hir enisesim wisenum. Nipaa Jisas kan ti, miye pirak winaak hirak kire haiu mit, hirak kerp ti kikaap haiu mit miyapir enun. Hi han kitet hi kiutipen hiriak enum hinin mit han hentar hi ewaank mit miyapir kerek nises him mirak. <sup>16</sup>Hi hiriak enum hinin mit, te Kraiss Jisas hanhana kentar hirak kakteikin mit karkeik hirak hanhan mit wisenum kemeriyor te hir enweikin sip enwet menmen enum. Hirak kerekyewem te maain mit han nemtau hi enuk, te hir han kitet nar ik: “Kraiss hirak werek kakikepa kar ke hirak kikaap Pol.” Hir enises him mirak te hir enu tipmain tipmain enum eik. <sup>17l</sup>Haiu mit emwenipi niuk iuwe mirak tipmain tipmain enum eik kentar menmen

<sup>e</sup> 1:7 1Ti 6:4, 20; Ta 1:10 <sup>f</sup> 1:8 Ro 7:12, 16 <sup>g</sup> 1:10 Ta 1:9 <sup>h</sup> 1:11 1Ti 6:15 <sup>i</sup> 1:12 Ap 9:15; Ga 1:15-16 <sup>j</sup> 1:13 1Ko 15:9-10; Ga 1:13 <sup>k</sup> 1:15 Lu 15:2, 19:10 <sup>l</sup> 1:17 Ro 16:27

hirak kerekyeyem. Nipaa ere in ere maain, hirak kinin naanmpire mit yapirwe. Hirak God kiutip kerekek kepu. Keiyak au. Mit nirek neriuwe nanamir au, te hirak kakkpau tipmain tipmain enum eik. God hirak yaaik wetpen!

**Timoti hirak kakises him yaaim kakinin mit enun nepan kakriuwere**

<sup>18</sup> Nikan kai Timoti, hi han kitet him nipaa God kewet mit em me ti, hir newepyapirem natip mit em. Hi hetput him im. Ti han ekitet him hir nipaa netputem, ti ewisim mamkepit ti hepu han tokik. <sup>19</sup> Ti atip mit him mirak yaaim, ti ehinin mit enun hir nepan ne Krai. Ti hiriak menmen im, ti ehises God, ti han yaaik prar prar ehu. Mit han hir neweikin sip newet menmen hir nertei hiram yaaim, te hir newaank hiras me menmen yaaim me God nar ke tukin kiwaai wit haiu miriak ere hirak kewep. <sup>20</sup> Haimenias ketike Aleksanda wiketeret hirakit tiriak menmen enum mar im. Hi epei hitehi Krai hirak kewis Seten kaksip, te hirakit etirtei ap tatip enum me God au emit!

**Menmen mit enisesim enitehi God em**

**2** <sup>1</sup> Menmen im minin hi hanhan hetputem te ti etip mit ein him manp em hiram im. Hir enitehi God me mit yapirwe nerer wit wit hirak kakikepi, hir natip God hirak yaaik kenter. <sup>2</sup> Hir enitehi God hirak kakikaap mitik iuwe king ketike mit yapirwe kerek ninin naanmpire haiu mit te hir nanwis haiu mit mamu werek werek haiu emises menmen yaaim emwenipi God emriuwere. <sup>3</sup> Mit hir enitiwekhi nanir ek hiram yaaim te mit nantip haiu yaain. Menmen im mamriak God kaiu hirak han yaaik. <sup>4</sup> Haiuemitehi God me mit yapirwe mentar hirak hanhan hir nanweikin sip nanwet menmen enum nanises him yaaim nanir hirak hanhan haiu emisesim. <sup>5</sup> God kiutip kepu kerekek. Mitik kekrehir ke haiu mit yapirwe kerp nimin kewenin God ketikewai yapirwe me menmen enum haiu miriakem. Hirak niuk mirak Krai Jisas. <sup>6</sup> Nipaa God kimat wi miutipen te Jisas kaa te hirak kakikepai me menmen enum haiu mit miyapir niutip niutip miriakem, hirak kaktaihis. Hirak keteikin mit yapirwe hirak wen hanhan mit hir enweikin sip nanwet menmen enum, hir nanisesik hirak kaktorhis. <sup>7</sup> Mar keremem te God kehimitena hi aposel hirak keriuweta hi hatip mit him mirak. Hi hemipin au. Hirak keriuweta hi hatip mit miyapir him mirak yaaim men mit ne weiwik me Isrel au. Hirak keriuweta hi hen mit heriyai heriyai ap ne weiwik ham te hir enirteyeyek enisesik werek.

<sup>m</sup> 1:18 1Ti 4:14, 6:12; Ju 3    <sup>n</sup> 1:19 1Ti 3:9    <sup>o</sup> 1:20 2Ti 2:17-18, 4:14-15; 1Ko 5:5    <sup>p</sup> 2:1 Ef 6:18; Fl 4:6    <sup>q</sup> 2:4 Esi 18:23; 1Ti 4:10; 2Pi 3:9    <sup>r</sup> 2:5 Ro 3:29-30; Hi 12:24    <sup>s</sup> 2:6 Ga 1:4    <sup>t</sup> 2:7 Ap 9:15; Ga 2:7-8; 2Ti 1:11

<sup>8</sup>Hi hanhan mit nerer wit wit hir nanitehi God. Hi hanhan mit nar ik hir nanweikin sip nanwet menmen me han enuk o hir nenehan me menmen, hir han yaaik prar prar nepu hir nikiam his mir nitehi God menmen.

### Him me miyapir hir enisesim

<sup>9</sup>Wi miyapir nererik neit winak ke God, hir ap hanhan neremink wipe yehes nises menmen yaaim yapirwe mau paan kir o neriuwet klos yaaim te hir nari han ke mit miyapir au emit! Hir nanriuwet menmen yaaim keremem miyapir yaain neriuwetem. Te hir neses hiras mar im. Hir enriak yaaim enkaap mit miyapir han. <sup>10</sup>Im em hiram yaaim mar ke menmen yaaim hir neriuwetem mau his, o teruk o nikip mir. <sup>11</sup>Hir miyapir hiras nankintip wire wire enu enit enimtau him me mit hir netporem me him me God hir enisesim werek werek. <sup>12</sup>Hi ap ewis miyapir nerp natip mit him me God neit winak ke God naanmipror au emit! Hir enkintip enu nentar menmen im. <sup>13</sup>Mit ninin naanmipre miyapir nentar nipaa God kinin kewis Adam. Mite niuk mire Iv hire wikaru. <sup>14</sup>Seten hirak kemipin Adam au. Iv kerepep. Hire winin wiriak menmen enum, hire weremir him me God. <sup>15</sup>Te hir wen nises him me God, hanhan God ketike mit han, hir han yaaik prar prar nepu. Hir naanmamre hiras te hir ap nanriak menmen enum au, te God kakikepi hir nanu werek nantikerek nanintar hir nepu witeik nanine nikerek nanteiknor him mirak.

### Him me mit kerek naanmipre mit miyapir ne weiwik miutip me God

**3** <sup>1</sup>Him im yaaim. Mitik hak kerek hanhan kinin naanmamre mit miyapir ne weiwik me God, menmen im hirak hanhanem hiram yaaim. <sup>2</sup>Mitik kar ik kiriak menmen yaaim, te mit nansiuwe him enum au. Hirak ketenen mite piutip kerepep. Hirak naanmamre hirekes ke menmen hirak kiriakem. Hirak kakwen han kirak me menmen yapirwe te hirak kakiriak menmen kar ke mitik iuwe kakriakem, te mit nantip hirak yaaik te naanmipri. Hirak han yaaik kakwet mit ne wit hak menmen mamit winak kirak. Hirak ekirtei him me God te hirak kaktip mit miyapir han em werek werek. <sup>3</sup>Hirak ap kaam tipar si enum ere ketaritari au emit. Hirak ap ketike mit nenehan nenapan me menmen au. Hirak ketikeri enu enit werek werek. Hirak ap hanhan pewek te han kirak kenke kenterim. <sup>4</sup>Hirak naanempre mite wetike nikerek nirak werek werek, hir nanises him mirak, te han kir katip kar ik: "Hirak iuwe hirak yaaik te naanmiprai me menmen yapirwe." <sup>5</sup>Mitik ap naanmipre

“ 2:9 1Pi 3:3-5    √ 2:10 1Ti 5:10    ∞ 2:12 1Ko 14:34    × 2:13 Jen 2:7, 22; 1Ko 11:8-9  
 √ 2:14 Jen 3:6, 13; 2Ko 11:3    ∞ 3:1 Ap 20:28    ∞ 3:2 Ta 1:6-9

mite wetike nikerek werek werek au, kakirkeik te hirak naanmamre mit miyapir ne weiwik miutip me God werek a? Taauye! <sup>6</sup>Hirak mitik kises him me God nipaa ein ere in au, hirak ap naanmamre mit miyapir ne weiwik miutip me God. Mitik kar ik hirak han ekitet hirekes iuwe kentar mit hir nisesik, te hirak han kitet werek werek au. God kakiwaankek kakintar hirak han kitet hirak iuwe kakir nipaa Seten epei kiriakem, te God kepirek kewaankek. <sup>7b</sup>Mit nerer wit wit han ekitet hirak yaaik. Au, te hir netpiwek hirak enuk hirak yink enuk kakises menmen enum, hirak seten kakiwaankek kakir saauk mit ne wit nenke hepin nekinenim.

**Him me mit hir nanriak menmen me mit  
miyapir ne weiwik miutip me God**

<sup>8</sup>Mit han kerek niriak menmen me mit miyapir ne weiwik me God hir enpar ke mit ninin naanmipre mit miyapir in. Hir mit yaain enriak menmen yaaim te hir nantip hir iuwe. Hir ap nantip nanwenin him au. Him miutip keremem. Hir naam tipar si enum yapirwe au emit! Hir ap enriak menmen me God, te hir nanri pewek yapirwe me mit kerek nises him mirak au emit! <sup>9</sup>Hir han ekitet him yaaim God epei kewepyapirem kewetaiyem hiram werek te hir enisesim werek werek mekre han kir. <sup>10</sup>Yi yinin han ekitet menmen hir epei niriakem hiram menmen mit kerek ninin naanmipre mit miyapir ne weiwik miutip me God hir enriakem o au. Hir niriak menmen yaaim, hir enriak menmen miikaap mit miyapir ne weiwik miutip me God. <sup>11c</sup>Miyapir nir hir enriak menmen werek, te mit hir nantip hir iuwe nar ke mikan nir. Hir ap nantipan nanisisan enum me mit miyapir han au emit! Hir nanim tipar si enum ere netaritari au emit! Me menmen yapirwe me God, hir enriakem werek werek. <sup>12</sup>Mit niriak menmen me mit miyapir ne weiwik miutip me God hir enit miyapir niutip keriyen, hir ninin naanmamre miyapir nir nantike nikerek nir werek werek, te hir enises him mir. Hir naanmipror nantike mit miyapir niriak menmen mekre winak kir. <sup>13</sup>Neimin hir niriak menmen yaaim yaaim me mit miyapir ne weiwik me God, mit han nantip hir yaain, te hir natip him yaaim me Krai Jisas wisenum.

**Hir o as bilong menmen God kiriakem**

<sup>14</sup>Hi hanhan anen ari waswas. Hi hewis tiwei im, te menmen <sup>15d</sup>metenina kike, ti tewen ertei hinin naanmipre mit miyapir nises him me God. Hirak God kepu kiriak menmen, mit hir ne weiwik miutip mirak. Hir netenen him mirak naanmiprewem nar ke teinik minan winak. <sup>16e</sup>Haiu matip him iuwe me him mirak mar im. Him hirak God kewepyapirem kewetaiyem me Krai haiu misesim hiram iuwe, te mit ap nantip hiram enum memipin au. Hiram matip mar im:

<sup>b</sup> 3:7 2Ko 8:21    <sup>c</sup> 3:11 Ta 2:3    <sup>d</sup> 3:15 Ef 2:19-22    <sup>e</sup> 3:16 Jo 1:14; Mk 16:19

“God keriuwetek kan keweikin his kire mitik, te hirak kakteiknaiyek.  
 God hirak keteikin mit Kraiss hirak Nikan kirak, wi nipaa God Himin Yaaik kikiak kekrit kau.  
 Hirak keteikin mit ensel hirekes.  
 Mit hir nisesik newepyapirek nerer wit wit. Mit nerer wit wit nemtewek nisesik.  
 God kitiwekhi keyyin ken wit kirak, hirak kepu ein naanmipre menmen yapirwe.”

#### Mit enun newenin him neteikin mit menmen enum

**4** <sup>1f</sup>God Himin Yaaik katip kar ik: Maain mit han nanweikin sip nanwet him me God, hir nanimtau him me tipir o herwe enum kerek hanhan nanweikin han ke mit hir naninaaiwir him me God. <sup>2</sup>Mit enun nemipin hir nantip mit miyapir him enum mar im. Hekrit hekrit mit in newenin him ere han kir kakmitorpin katip hir nemitetpin mit miyapir han, hiram menmen weinim. <sup>3g</sup>Mit nar ik natip mit miyapir hiram enum te hir nanitan, o hir nanim menmen ham meiyam. Te haiu mit kerek mises him me God haiu mertei him mirak werek werek, haiu mertei God kiriak menmen im te haiu minin mitehi God haiu metpiwek hirak yaaik, haiu mamim. <sup>4h</sup>Menmen yapirwe God kiriakem hiram yaaim. Hiram enum au. Yi yitehi God yi yaitip yi han yaaik yeriuwerek, te yi yayim. <sup>5</sup>Him me God metike him yi yewenipiyek yeriuwerem hiram miriak menmen hiram yaaim te yi yayim.

#### Timoti kakriak menmen yaaim me Kraiss

<sup>6</sup>Ti atip nit yinan ein him im, te ti mitik yaaik hiriak menmen me Kraiss Jisas werek werek. Him yaaim me God ti hewetewem, ti eisesim. Hiram mamkepit ti eriak menmen mirak mar ke menmen mamkaap yink kit. <sup>7i</sup>Ti eweikin sip ewet him me wit tipir o tipitim weinim kerek mit miyapir enun ne mit hir netpin nisesim. Hiram yaaim te mit kerek nises God hir han kitetim au emit! Ti naanmampre hirekes te han kit hirak kakises him me God kerekek. <sup>8j</sup>Ti esiuknen eininem, hiram mamkepit kike, te ti yink kit kaku werek. Ti yaaik eriakem, te ti ehinin eiyses him me God mekre han kit. Menmen im mamkaap himin kit wisenum me petepin in ek, hiram mamakekpik maain ti etike God yi eiyu eiyit. <sup>9k</sup>Him im hi hetputem hiram yaaim mit nanimtwewem nanisesim. <sup>10l</sup>God kepu haiu memeriyyewek kaknen kakithis haiu mit miyapir kerek

<sup>f</sup> 4:1 2Ti 3:1; 2Pi 3:3; 1Jo 2:18; Ju 18 <sup>g</sup> 4:3 Jen 9:3; Ro 14:6; 1Ko 10:30-31 <sup>h</sup> 4:4 Jen 1:31; Ap 10:15 <sup>i</sup> 4:7 1Ti 1:4, 6:20; 2Ti 2:16 <sup>j</sup> 4:8 1Ti 6:6 <sup>k</sup> 4:9 1Ti 1:15 <sup>l</sup> 4:10 1Ti 2:3-4

memtau him mirak misesik. Hirak hanhan kakikepei haiu mit yapire, maain hirak kaktaihis, haiu mit miyapir meperkikem mamisesim han ekitetim. <sup>11</sup>Ti atip mit miyapir ein him manp me menmen im ti eteiknorem te hir enisesim. <sup>12</sup><sup>m</sup>Ti ap ewis mit hir naninan yipir nanwirek nanintar ti pipiak au. Ti ehinin mit eteiknor menmen yaaim, te hir enisisutem. Ti atip him yaaim, eises menmen yaaim, hanhan heriuwe mit, ehises him me God, han yaaik prar prar ehu, te hir nanises him mit. <sup>13</sup>Ti wen emeriyo hi anen, ti ekine him mau tiwei me God etpim him iuwe eteikin mit miyapir menmen mirak werék werék. <sup>14</sup><sup>n</sup>Ti naanempre hirekes te ti eriak menmen nipaa God Himin Yaaik kewepyapirem kewetitem. Hirak kewetitem me wi mit profet natip God kewetitem, te mit iuwe kerek naanmpire mit miyapir ne weiwik miutip me God hir newis his mentar paan kit, te ti hetiwem. <sup>15</sup><sup>o</sup>Ti ehises menmen im ti han ekitetim iuwe te maain mit nanir menmen ti eriakem, hir han kir katip ti epei hiriak menmen in ek, ti hiriak menmen yaaim iuwe. <sup>16</sup>Ti naanmpire menmen mit ti hirekes eriakem metike menmen ti eteikin mit em. Ti eises him im hi hetputem, ti ekaap hirekes hetike mit kerek nemtau him mit. Te yi eiyises him me God werék werék, maain yi eiyu eitikerek.

### Him mamkaap Timoti kinin naanmpire mit miyapir

**5** <sup>1</sup><sup>p</sup>Ti ap ene ne mit au emit! Ti etpor main main ekepi har ke ti hikaap haai kit. Ti atip ekaap pipep yapirwe har ke ti ekaap kikrek nit. <sup>2</sup>Ti ekaap miyapir enun ne mit ehir ke ti hikaap miye pit. Ti hikaap miyapir nihan har ke ti ekaap yenten pit. Te ti han yaaik prar prar ehu. Ti ap han ekitet ari nihan au emit!

### Him me miyapir mikan nir epei naa

<sup>3</sup>Mitik ke mite kerek wises God, hirak kaa, te hire wepu weiniye, ap mitik kei naanmpirewe au, mit miyapir ne weiwik me God nankepiye naanmampirewe werék werék. <sup>4</sup>Au ek, nikerek o nepenyerer nepu, hir naninin nanirtei hiras naanempre miye haai o maamrer nir, hir naanempror emrer menmen nipaa miye, haai o maamrer nerekyorem. Hir enriakem te God han yaaik ekriuweri. <sup>5</sup><sup>q</sup>Mitik ke mite hire wises God hirak epei kaa, hire wepu weiniye, mit ap naanmpirewe au, hire wises God hekrit hekrit, hire witiwekhi hirak kakikepiye me menmen. <sup>6</sup>Te mite hap kerek mitik kire epei kaa hire wepu weiniye, hire wauriak enum wises han kire, te hire wises menmen yapirwe me ti, hire war ke mite epei waa wentar hire weweikin sip wewet God. <sup>7</sup>Ti etip miyapir etpor him manp hir enises him im hi epei hetputem, te mit han ap nanitpor

<sup>m</sup> 4:12 Ta 2:15    <sup>n</sup> 4:14 2Ti 1:6; Ap 6:6, 8:17    <sup>o</sup> 4:15 1Ti 5:22    <sup>p</sup> 5:1 Lev 19:32    <sup>q</sup> 5:5 Lu 2:37, 18:7

me menmen enum me wi hir naanmipror me menmen. <sup>8</sup>Neimin hir ap naanmamre mit nir ne weiwik miutip, o neimin hir ap naanempre miye haai nir, hir enun. Menmen enum im hir niriakem hiram enum minin menmen mit enun ap ne weiwik me God hir niriakem.

<sup>9</sup>Mit miyapir ne weiwik me God, hir enwis niuk mir emu tiwei me miyapir nar ik hir naanempror. Neimin nepu weinin, hir ne miyapir, hir naninin 60 tito, nipaa hir neit mit niutip niutip keriyen. <sup>10</sup>Mit miyapir hir entip hir epei niriak menmen yaaim mar im: Hir nine nikerek naanmipror werek werek, hir newet mit miyapir ne wit hak menmen, hir nekemyet hit me mit miyapir nises him me God neteiknor hir han yaaik nankepi. Mit miyapir nipaa menmen mewaanki, hir nipaa niriak menmen yaaim yapirwe nekepi. Neimin niriak menmen mar im, te hir mit miyapir naanmamror. <sup>11</sup>Hir ap enwis niuk mau tiwei hekrit hekrit naanempre miyapir nihan netike miyapir tokek kerek mit nir epei naa au, hir nepu weinin au emit! Maain hir han kir kakikrit, hir han yaaik niriak menmen me Krai au. Hir hanhan nanino nanit mit han. <sup>12</sup>Te hir nanwen him nipaa hir netpim me hir nanu weinin nanriak menmen me mit miyapir ne weiwik me God keriyen. Hir niriak menmen im, te mit nantip hir niriak enum. <sup>13</sup>Miyapir nihan netike miyapir tokek mit nir epei naa, hir niriak menmen mar eim metike menmen im. Hir nanu yain yain nanrer winak me miyapir han, hir nanimtau him natipan nisesan me mit miyapir han, hir nanino nantip menmen ap yaaim, te hir nantip menmen haiu minaan hir netpim. <sup>14</sup>Te hi hanhan heriuwe miyapir nihan netike miyapir tokek kerek mit nir epei naa, hir enit mit han, nanine nikerek, naanempre menmen mir me wit, te hir ap enwis mit miyapir enun nanipei enum au, haiu emu werek werek, te haiu ap yink enuk au. <sup>15</sup>Miyapir han epei neweikin sip newet menmen yaaim, hir nises menmen enum me Seten. <sup>16</sup>Mit miyapir nises him me God, mitik kei kir kaa, mite pirak wepu weiniye, hir hiras naanemprewe, te mit ne weiwik me God au. Hir nankaap miyapir enun ne mit weinin keriyen, nanwetir menmen naanmamror.

### Him me mit iuwe ninin naanmipre mit miyapir han

<sup>17</sup>Hiram yaaim te hir mit kerek naanmipre mit miyapir ne weiwik me God ein, hir mit miyapir mit ein nanrekyor yaaim. Hiram yaaim te hir enwet mit iuwe in pewek me wi wik me menmen hir niriakem mamre wi miutipen. Hiram yaaim iuwe te mit ninin naanmipre mit ne weiwik me God netike mit kerek natip mit miyapir him me God, hir enwetir pewek me wi wik me menmen hir niriakem mamrer wi miutipen mar ke mit han ein. <sup>18</sup>Menmen im hiram yaaim mentar tiwei me God matip mar

---

<sup>r</sup> 5:10 Hi 13:2   <sup>s</sup> 5:13 2Te 3:11   <sup>t</sup> 5:14 1Ko 7:9   <sup>u</sup> 5:17 1Ko 16:18   <sup>v</sup> 5:18 Diu 25:4; 1Ko 9:9; Mt 10:10



im: “Bulmakau kentirer rais haas keremsuwo, ti ap ehit waai eiyeppet him miram au.” Hiram wen matip, “Keimin kiriak menmen, hirak kakit pewek mamrerim.” Mit kerek natip mit miyapir him me God, hir mit ne weiwik me God naanmamror nanwetir pewek me menmen. <sup>19</sup>“Ti ap emtau him me mitik kiutip hirak katip kesiuwe him me mitik iuwe naanmipre mit miyapir ne weiwik miutip me God ein au emit! Mitikit wik o wikak tatnen tatsiuwe him mitik, te ti emtau menmen hirakit tatputem. <sup>20</sup>“Hirak kiriak menmen enum, ti enerek etpiwek me ninaan me mit miyapir ne weiwik miutip me God ein, te hir eninaain hir ap enises menmen hirak kiriakem au emit!

<sup>21</sup>Me ninaan me God, Jisas Krai ketike mit nirak ensel, hi hetput him manp. Ti ehises him im hi nepei hetputem. Ti eriak menmen me mit miyapir ne weiwik me God, te ti eriakem empiram empiram. <sup>22</sup>Ti ap ewis his mentar mitik waswas te ti ehimitanek hirak naanmipre mit miyapir ne weiwik me God neit wit hak au emit! Maain hirak kakriak menmen enum, menmen enum mirak mamwit, te ti naanmamre hirekes keimin ti ewis his menterik ehimitanek hirak kinin naanmamre it ne weiwik me God. <sup>23</sup>Ti ap ehim tipar weinim au emit! Ti hinap yapirwe, te ti ehim tipar wain meiyam emnep menmen mekre tu kit.

<sup>24</sup>Menmen enum mit han niriakem, mit yapirwe hir nerteiyem, te haiu han kitetim haiu mertei hir mit enun. Mit han niriak menmen enum nisawinem au meit, haiu mepitariyem. Te God han kitetim maain hirak kakwepyapirem kakteikin mit em. <sup>25</sup>Mar im, menmen yaaim mit han niriakem, mit yapirwe nerteiyem hir han kitetim. Te menmen yaaim mit niriakem te mit nerteiyem au, God han kitetim te maain hirak kakwepyapirem kakteikin mit em.

### Him me mit hir niriak menmen me mit nir iuwe

**6** <sup>1</sup>Mit kerek niriak menmen me mit nir iuwe hir han ekitet mit iuwe nir hir yaain, te hir mit iuwe ap nantip enum me niuk me God kaktike menmen mit ne weiwik me God hir niriakem. <sup>2</sup>Mit kerek niriak menmen me mit nir iuwe hir nises him me Krai, hir ap naninan yipir nanwirek han kakitet nanir ik: “Hirak kai yinak kerekek, te hi eweikin sip ewet him mirak ehises han kai kerekek.” Menmen im au emit! Hir han ekitet menmen yaaim enriak menmen yaaim iuwe nankaap mit iuwe nir nentar mit iuwe nir nises him me Krai, hir hanhani nanrekyor yaaim.

### Menmen yaaim yi eiysesim te yi eiye werek werek

Hekrit hekrit ti eteikin mit menmen im ti etporem te hir enisesim. <sup>3</sup>“Jisas Krai ketpai him yaaim hirak kekepai haiu mises God. Mitik hak

<sup>w</sup> 5:19 2Ko 13:1    <sup>x</sup> 5:20 Ga 2:14; Ef 5:11    <sup>y</sup> 6:1 Ef 6:5; Ta 2:9-10    <sup>z</sup> 6:2 Fm 16    <sup>a</sup> 6:3 2Ti 1:13; Ga 1:6-9

hirak ap kises him yaaim me Mitik Iuwe kaiu Jisas Kraiss, hirak katip mit him ham, <sup>4</sup>hirak mitik enuk paan tokim kertei menmen me God werek werek au. Hirak hanhan ketike mit han hir natipan naninehan nanintar him weinim. Him im mamriak mit hir han kekrit han enuk neriuwehan, hir nenehan me menmen, hir natipan enum nesiuwehan him enum, hir han kitet enum me nir yinan. <sup>5</sup><sup>b</sup>Mit nar ik nipaa nises God, te in ek hir neweikin sip newet God, te him mirak mau mekre han kir au. Hir newaank hiras han kir enuk netari him mirak. Hir han kitet hir natip mit him me God hiram mamkepi, hir nanit pewek yapirwe, te hir nanu werek werek. Te hir au.

<sup>6</sup>Mit han yaaik nanu nanriuwe menmen hir nipaa ere in netenenim, hir nanises him me God, te menmen im mamkepi hir nanu werek werek. <sup>7</sup><sup>d</sup>Nipaa miyerer naiu ninai, haiu me his mepnen. Maa in haiu mami, haiu mamihis mamno. Pewek hiram ap te mamirkeik mamkepai te God kaktip haiu yaain te haiu mamu werek werek a? Taauye! <sup>8</sup><sup>e</sup>Haiu metenen menmen mamim mamtike menmen haiu mamriuwetem naanmamre yink kaiu, hiram werek. <sup>9</sup><sup>f</sup>Te mit kerek hanhan nanit pewek yapirwe, hir nire sak ketut hapik me menmen minin hirak kakno kakim au. Hirak ketari hirak kenke kaa kekre hei. Mit kerek hanhan pewek yapirwe, hir nire sak. Han kir kakinke kakintar menmen yapirwe te hir nanises menmen enum, hir naniwaank hiras. <sup>10</sup>Mit han kir kenke kentar pewek, hiram hir o as me menmen enum yapirwe. Mit han hir han kir kenke kentar pewek, te hiram menipi hir neweikin sip newet God. Maa in hir han tewenin hiras me menmen enum hir niriakem.

### Ti naanempre menmen God kewisim mekre han kit

<sup>11</sup>Te ti mitik ke God, ti enepin menmen im enum. Ti eweikin sip ewetiwe. Ti eriak menmen yaaim ehises menmen God hanhan haiu mamisesim, ehises him mirak, ti hanhan mit, ti han tokik ehu me mit hir nerekyut menmen enum, ti ap han enuk heriuwe mit erekyor enum au emit! <sup>12</sup>Ti ehises menmen God emikre han kit iuwe enum emir ke mit hir hanhan nesiuknen waswas nanit menmen. Ti hiriak menmen mar im, hiram mamkepit te ti ehises menmen mirak werek werek ere maa in ti etike God yi eiyu werek werek. Nipaa God kehimitenut me menmen im, ti nepei atip mit yapirwe etpor har ik: "Hi ami ehises him yaaim me God." <sup>13</sup>Hi hetput me ninaan me God kerek kiriak menmen yapirwe mamu mamit, hirak ketike Jisas Kraiss kerek nipaa katip him yaaim me God kerp ninaan me mitik iuwe gavman Pontias Pailat, <sup>14</sup>me ninaan me God ketike Kraiss Jisas hi hetput, ti naanempre hirekes ehises

<sup>b</sup> 6:5 2Ti 3:8, 4:4; Ta 1:14    <sup>c</sup> 6:6 1Ti 4:8; Fl 4:11-12; Hi 13:5    <sup>d</sup> 6:7 Jop 1:21; Ekl 5:15  
<sup>e</sup> 6:8 Pro 30:8    <sup>f</sup> 6:9 Pro 23:4, 28:22

him nipaa hi hetputem, te mit han ap nantip enum me menmen im au. Ti naanempre menmen im ere Mitik luwe kiau Jisas Krai kaknen kakwepyapir hirekes me wi God kaktip hirak werek te hirak kakriuwet Krai pike kaknen. <sup>15</sup>Krai pike kaknen me wi kerek God kimat hirak kaknen, God ik hirak yaaik kerekek hirak Mitik luwe kinin mit iuwe yapirwe, hirak hirekes kerekek hirak iuwe. <sup>16</sup>Hirak kerekek kaki au hirak kaku tipmain tipmain enum eik. Hirak kau kekre si iuwe merhihe wisenum minin wepni ap te mit nanino menep nanirek taau! Nipaa ere in mitik kiutip ap kirek, ap te haiu mit ne ti nanirek taau. Haiu mit emwenipi niuk mirak hirak iuwe, hirak kakinin naanmamre menmen yapirwe tipmain tipmain enum eik. Keremem.

### Him me mit hir netenen menmen yapirwe

<sup>17</sup>Ti atip mit kerek netenen pewek yapirwe, hir ap han kitet hiras hir yaa in ninin mit han ein, au emit! Hir ap han ektip menmen mir yapirwe mamkepi taau. Hiram mamiwaank waswas. God kerek kewetai menmen yapirwe mamrekyei han yaaik, hirak kerekek kakikepi. Pewek taau! <sup>18</sup>Ti etpor pewek mamkepi te hir nanu werek au. Menmen yaa im hir niriak mit em hiram mamkaap hiras hir nanu werek werek. Te hir enriak yaa im enkaap mit enwetir menmen mir yapirwe. <sup>19</sup>Hir nanriak menmen im nanir ke hir nemi menmen me maain mamkepi. Hiram yaa im mar ke teinik kikaap winak keperp, hiram mamkepi nanu werek werek nantike God tipmain tipmain enum eik. Hir nanriak menmen mar im in ek, hir enu werek werek nanir maain hir nantike God nanu. Menmen im keremem mamkepi hir nanu werek werek. Pewek taauye!

### Ti naanempre menmen mit werek werek

<sup>20</sup>Timoti, ti naanempre him yaa im me God werek werek nipaa mit han netputem, te ti atip mit han em. Ti eweikin sip ewet him enum weinim ap mises him me Krai. Ti eweikin sip ewet him enum me meremir him yaa im haiu misesim. Mit nemipin natip nar ik: “Yi eiyises him maiu yaa im, te yi eiyirtei wisenum.” Menmen im au emit! <sup>21</sup><sup>h</sup>Mit han hir nises him mar im, te hir ninaaiwir him yaa im me Krai newaank hiras.

Hi hanhan God kakrekyi menmen yaa im.

### Mepir keremem

<sup>s</sup> 6:20 2Ti 1:14; 1Ti 4:7 <sup>h</sup> 6:21 2Ti 2:18